

Chastellans si Munt Danuder

DA GUIIU SOBIELA-CAANITZ

■ **La vischnanca da Valsot en Engiadina cunfinescha encunter ost cun quella da Danuder en il district tirolais da Landeck. Danuder (1394 m, 1556 olmas il 2017) viva cunzunt da l'agricultura e da la stagiun d'enviern. Enfin a l'Emprima Guerra mundiala devi in «Gerichtsbezirk» tirolais da Danuder.** 1919 ha l'Austria stuì ceder a l'Italia quatter da las set vischnancas dal district. Il chastè si Munt Danuder ha lura pers ses status da center giudizial. El valea pli baud na sco fortezza, mabain cunzunt sco sedia da dretgira cun giurisdicziun criminala. Il giurist Rainer Silbernagl (Universitad da

Salzburg) ha gist deditgà in essai ordvart manidel davart il passà da lez chastè*. L'autur scriva: «Enfin a l'emancipaziun giudiziala da l'Engiadina Bassa [1652] cumpigliava il district ils vitgs da Raisch, Graun, (...) Son Valentin e Langtaufers, lura l'Engiadina Bassa enfin a Punt Ota sper Zernez, il Paznaun Sura e Samignun (...). A Danuder e Martina sa rimnavan las assembleas avant las baselgias; era là vegnivann las sentenzias proclamadas (...). Enturn 1440 fachevan ils curaturs da Munt Danuder anc adina dretgira en Engiadina Bassa; dentant (...) reconuscheva probablmain mo Scuol ils derschaders tirolais (...). Ils spirituals eran incumbensads cun l'assistenza psichica

dals praschuniers sunter la publicaziun da las sentenzias» (pp. 9 e 14–16). Son Valentin e Langtaufers fan ussa part da la vischnanca sidtiroloisa da Graun (Vnuost). L'essai da Silbernagl cuntegn la glista «Pfleger, Richter, Pfandschaftsinhaber» si Munt Danuder (pp. 17–19). L'autur resguarda la sedia da dretgira en il chastè sco «in remartgabel bain cultural tirolais» (p. 17). La vasta bibliografia menziuna t.a. Peter Conradin von Mohr (1819–1886) e Chasper Pult senior (1869–1939).

* **Rainer Silbernagl, Burg und Gericht Naudersberg. En: Der Schlern, 92avla annada, favrer 2018, carnet 2, pp. 4–32. Editura: Athesia, Weinbergweg 7, I-39100 Bul**



Il vitg da Fuond en il Danuder.